

O‘simliklar karantini nazoratidagi mahsulotlardan foydalanish shartlari va O‘zbekiston Respublikasi hududida aniqlangan o‘simliklar karantinidagi zararli organizmlarga qarshi kurashish

1. O‘simliklar karantini nazoratidagi mahsulotlarni etishtiruvchi, tayyorlovchi, realizatsiya qiluvchi, qayta ishlovchi, eksport yoki import qiluvchi yuridik va jismoniy shaxslarning mahsulotlar saqlanadigan omborxonalari har oyda bir marta hududiy o‘simliklar karantini davlat inspeksiyalari tomonidan karantin nazoratidan o‘tkaziladi.

2. Zarur bo‘lganda, o‘simliklar karantini davlat inspektorining xulosasiga asosan xavfsizlik qoidalariga rioya etgan holda zararsizlantirish, tozalash va boshqa tadbirlar amalga oshiriladi.

3. O‘simliklar karantini nazoratidagi mahsulotlarni etishtiruvchi, tayyorlovchi, realizatsiya qiluvchi, qayta ishlovchi yuridik va jismoniy shaxslar o‘zlari joylashgan hududlarning fitosanitar tozaligini ta‘minlash uchun o‘simliklar karantini hududiy davlat inspeksiyalari bilan kelishib, mas‘ul xodim ajratishlari shart. Ushbu xodim hududdagi o‘simliklar va saqlanayotgan o‘simlik mahsulotlarining fitosanitar holati bo‘yicha kuzatuv olib borishi, zararlanish yoki zararli organizmlar aniqlangan holatda esa zudlik bilan o‘simliklar karantini davlat inspeksiyasiga xabar etkazishi shart.

4. Transport vositalari va o‘simliklar karantini nazoratidagi mahsulotlar saqlanib turgan joylar o‘simliklar karantini davlat inspektori talabiga binoan yuk ortilgan transport tashkilotlarining vakillari, yuk egalari ishtirokida o‘simliklar karantini ko‘rigidan o‘tkaziladi.

5. O‘simliklar karantini davlat inspeksiyalarining ruxsatisiz joylarda o‘simliklar karantini nazoratidagi import mahsulotlarni boshqa tashkilotlarga berib yuborish yoki boshqa hududlarga jo‘natishga yo‘l qo‘yilmaydi.

6. O‘zbekiston Respublikasidan olib chiqib ketiladigan o‘simliklar karantini nazoratidagi mahsulotlar O‘zbekiston Respublikasining o‘simliklar karantini bo‘yicha tuzilgan xalqaro shartnomalariga, shuningdek, savdo shartnomalari va import qiluvchi mamlakatning fitosanitar talablariga javob berishi lozim.

O‘zbekiston Respublikasining o‘simliklar karantini to‘g‘risidagi xalqaro shartnomalari va import qilayotgan mamlakatning fitosanitar talablari to‘g‘risidagi ma‘lumotlar Inspeksiya rasmiy veb-saytida e‘lon qilinadi.

7. O‘zbekiston Respublikasi hududida aniqlangan o‘simliklar karantinidagi zararli organizmlarga qarshi kurashning quyidagi usullari amalga oshiriladi:

o‘simliklarning o‘sish davrida uchraydigan karantindagi zararkunandalar, o‘simlik kasallik qo‘zg‘atuvchilari va begona o‘tlarga qarshi kimyoviy, mexanik hamda boshqa qiruvchi kurash chora-tadbirlari;

omborxonalar, yopiq bino va inshootlarda o‘simliklarni karantindagi hasharot va kasalliklariga qarshi zararsizlantirish ishlari (fumigatsiya) va boshqa chora-tadbirlar;

omborxonalarda saqlanayotgan o'simlik karantini nazoratidagi mahsulotlarda karantindagi yoki zaharli begona o't-urug'lari aniqlansa, ular tozalanadi hamda chiqindilari yoqib yuborish yo'li bilan yo'qotiladi;

karantin nazoratidagi mahsulotlarda begona o't turi aniqlanib u zaharli bo'lmasa, ularni tozalash natijasida chiqqan chiqindi tegirmonda karantin begona o't-urug'larining unish qobiliyatini yo'qotish holatiga kelguncha maydalanib, chorva mollarini oziqlantirish uchun foydalanilishi mumkin;

urug', ko'chat yoki o'simlik mahsulotlarining karantin zararkunanda, kasallik yoki begona o't urug'i bilan zararlanganligi aniqlansa, ularni belgilangan tartibda zararsiz holga keltirish uchun barcha xarajatlar yuk egasining hisobidan amalga oshiriladi.